



盧隱集卷二

短句咏物三篇

鳳鳥久不至丹穴邈莫尋如其今來儀不異他山禽  
所以鳴岐後千古闕其音

靈龜妄出洛箕衍天地開厥後卜筮興剗腸爲禍胎  
試問曳尾者泥塗知免哉

晝眠苦多蠅夜眠苦多蚊臭蟲何知禮疾足伏紛紛  
可憐此物盛使我不夢君

東海高書後之著



北邙

鬱鬱瞻京闕行行陟北邙金谷在其西雲臺處其陽  
丘陵一何高纍纍間道旁碑碣半磨坳多是漢侯王  
松柏爲人伐濯濯空陂崗銘器爲人竊金盃鑄古章  
西臨韓城道墓有張子房黃石公安在辟穀竟荒唐  
今人多少塋新陳骨相望魂魄會重泉千古卽同堂  
城中歌鐘沸生者樂未央有情哭無情歸復廼事常  
縱聽雍門琴何必淚沾裳

洛中五日旅病作

檻猿攀故林庭鹿號故丘嗟我身羈束時序忽已遒  
洛陽富名勝金谷聯蜚樓綵絲繫白日歌吹傾蒲榴  
而我嬰風熱喘嗽如吳牛凌晨趨府塵折腰見督郵  
輿臺或瞋目無錢不自謀憲也貧非病余則病兼憂  
面瘦謝臨鏡眼青怯梳頭對酒寡進觴獨醒迥增愁  
澤畔顛顛客舉世况同仇神龍辱泥塗不如跛鼈游  
誓將渡迷津蹈海狎輕鷗

龍門

龍門洛陽戶雙闕鬱崇高伊水劃中流巨靈劈神鼇

伯禹勤四載河廣不容刀蛟蜃吐雲氣樓臺乘暮濤  
千巖置萬龕石佛隱映牢大或踰丈六細亦辨秋毫  
數比恒河沙須彌類一毛不聞好事傳嗚呼孰者勞  
悵望賓陽洞斜日帶青袍虛岑答歌嘯空中若笙璫  
咄嗟風塵客行役正蕭騷喟茲鳥過日屏營首重搔  
轉盼有今昔無生愧緇曹上馬咏新詩何以慰我忉

汝州絕糧

勞人何草草羈客憎碌碌談諧竊自笑欲分侏儒粟  
地主贈一金果然欣已足未解從吾好何事執鞭辱

公役有期程雙鬢久卷曲寧嬰苦塵蒙尚怕長官督  
山海饒白雲引領騁遐矚

盧氏行示吏民有序

丁未歲高子令盧氏到官後綜理故牒尚闕  
三百餘事逋賦六七年未有完籍庫內僅七  
十餘金而人情刻弊政煩令格上下之間相  
稽延守歲月而已郡符督促賦課無虛日智  
殫力竭莫能應也吾欲去則未得欲留則不  
展待罪維谷之甚迺竊比古人之意作詩一  
篇以宣上命下焉非  
以聲律取達意而已

水行不方舟山行不容車城邑拱周垣四面塞交塗  
修畛被危岑罷民安穴居君子審憂患小人寡懼虞

公檄滿百適容易要忽諸蒲鞭竟欲施其奈侮吏胥  
孰云官帑實而無百金儲旱魃矧爲虐麥乾豆苗枯  
老弱見菜色子遺棄井廬寧忍繭絲理稅斂積歲逋  
前賢之所寬追呼胡爲余陽城催科拙倪寬課殿初  
上官督責急切切違慢誅蓋爲國賦爾王事亦難紆  
力殫才不贍所願姑徐徐 聖明罷采金山澤氣頗  
蘇穀爾蚩蚩氓終事輸田租余忝爲父母乳哺畢區  
區又何獄訟煩鳥獸而駭吁誰司教化者無狀有是  
夫閉門自思過告誡百姓愚我腰減束帶意欲歸鄉

間上負報

天子下愧許微軀鄙詞聊可獻一當流涕書

一縣竹行爲永寧楊明府作兼懷米仲詔

昔聞河陽一縣花近接永寧一縣竹竹之實鳳鳥食  
竹之枝鳳鳥宿雲氣晴冒青冥天雨色寒逼嵩芒麓  
茂宰值此皆天啟後有楊君前有米已聞清篠直如  
矢更識高節淨於洗我友米生况善畫應寫萬箇歸  
丹陛今我邑屋忝比鄰經過百遍流泉底子猷不問  
主人名幼輿合置丘壑體寄倩米生貌瀟湘著我醉

眼卧其旁何況此地昔有召伯棠楊君之竹勿剪傷  
喜雨篇

南陸鬱驕陽隆曦赫方馳朝樹辭脩幹夕葉隕榮枝  
焚巫竟杳冥祝龍屢嗟咨徒步禮壇坵凝思望川坻  
天高聽伊邇精誠見於斯豐隆驅雲駕少女展微颺  
靈雨被芳圃清波溢廣池入夜稍破塊凌晨猶颺絲  
黍稷肅芡芡瓜瓞何猗猗九秋尚可望五月茲已遲  
仰慙昊穹鑒不遺名位卑崗巒塞郊甸泥濘澀車轍  
潤澤農夫切匪遑室家私黽勉絃歌化孔莞豈我欺

時余家人尚在塗次未到

聞家人將到志喜口號

三千里外故鄉遠五六月間行路難與報僕夫休更  
問惟聽兩字是平安

二

久待偏嫌烏鵲遲眼穿心折倒衣時孟光到日莫相  
笑愧是梁鴻歌五噫

三

不道今年又遠遊漫攜妻女更何求家人若聚難輕

去索益悠悠留滯愁

### 病鸚鵡行

有貽余二鸚鵡者其一病  
吭不任飲啄傷之作詩

號城羈客減餐食坐對鸚鵡長太息愁思如聞怨別  
離病身強舉觸徽纒短毛禿尾猶矜重紅嘴綺翼少  
顏色聰明底事被樊籠言語學成轉哽塞饒君粟豆  
抱長饑亦有鄉關歸不得我欲開籠舍汝爲恐汝翻  
飛更無力故巢萬里路復迷隴水秦山渺何極去住  
甚憐無友聲汝意何從對以臆驚叫酸啼淚濕衣低

愁羅網高愁弋且須將養試羽翮待接雲霄黃鵠翼  
君不見滿林百舌還啾唧

### 漫興

千山萬山飄翠微四月五月倉鷓飛已過春期後杜  
宇方知萬事不如歸

二

潘生更拙三爲令叔夜其如七不堪去歲滄波歸釣  
艇滿林風雨閉茅菴

### 慙幽賦

夫何之子之婉孌兮遵姬姜之遺則依九十以令儀  
兮忘新舊忽焉隤惻嘆生命之乖迂兮要暵日以終  
極休宵夜之多露兮喟憤恨而不測枉君子以停盼  
兮妾煩寃而內默微予罪以長辭兮雖溝瀆予庶罔  
忒諒九死其未悔兮掩悅懣而汎瀾逝貞魂之逖逖  
兮招巫咸而不還鬱墳草以東傾兮吐芾芾之芳蘭  
長萎絕於異鄉兮未履霜而知寒對父母之怨尤兮  
魂冥冥而自悲寄淑情於白雲兮託神人之微詞侍  
宓妃以偕逝兮陪漢女而游思洛水湯湯其如帶兮

緱山翠翠以依眉采明珠以貽言兮願相與偕乎終  
古恨形神之離棄兮捐長佩而愁予

夏日盧氏署中撥悶

萬山回合倒高齋細竹青青覆土堦日有此君堪遣  
悶一行作吏少開懷千家杼軸空搔首百遍公卿費  
乞骸擊柝抱關吾黨事陸沉應得學談諧

五噫歌

登彼嵩丘兮噫黃河東流兮噫城郭廡廡兮噫東京  
遨遊兮噫孰知我憂兮噫



定情詩

日西月東出江海不回流與君期夙昔約誓在白頭  
匪乏抱柱信邂逅憶綢繆橋下浮萍草風吹忽顛倒  
波上雙鴛鴦羽翼自相當妾身如井幹霜露知天寒  
君心如轆轤輪轉只須臾北鄰有好女自名爲羅敷  
采桑南陌上彈瑟矜其夫南鄰董嬌嬈十五未可挑  
前堂競歌鐘後房吹笙簫星月亦有行妾人亦有情  
思君兮不知夢君兮不明旁人相訾詬但道無所成  
頭上金爵釵蛛絲罨塵埃耳間明月珠棄置委泥塗

十指澀環銀皓腕不復伸雙蛾沈鏡影清波日夜冷  
腰下珊瑚玦繫久絲繩絕足下綺文履蒼苔生其底  
譬彼薜華枝榮耀詎幾時譬彼斷瓶綆千尺絕還期  
君心未可料妾情終不移常懷中道怨薄命匪人爲  
父母寧見察兄弟誰明之天地諒昭昭鑒我長相思  
盧城雜詩

故里生涯拙他時宦跡存地偏埋日窟山迥入河源  
鳥雀頻千點柴桑似一村潘生秋興賦不待已銷魂

西南俯隱几熊耳最尊峯萬水憑爭長羣山若附庸  
居人輕虎豹老樹睡蛟龍勝絕心逾怯秋聲萬壑春

三

懶性合逃俗微官原爲貧家書還兩月客路到三秦

重地峭函接維藩邠鄆新洛中時建親藩乾坤多事外松菊

屬何人

四

路絕攀雲窟峯回倒日車秦山時鬪虎洛水不生魚

夸父思隨杖神龜已闕書由來辟地客吏隱兩何如

五

六月黃鸝語他山似故山况無蛙黽聒兼對聽蛙閒

秋色期開酒浮名遠閉關淮陽應不薄長孺未須還

六

北山蹊徑渺迴復入微茫陰隴偏嫌黍陽崖間有桑

烹鮮曾不效害馬况多方元亮真高節歸來興甚長

七

縣齋當翠岫暝色到書幃雨挹家家碧晴延處處暉

土民同鳥鼠木客著裳衣爾輩堪相狎曾忘海上機

盧隱集 卷二 九  
往往逢父老時時咨雨暘微才忝令宰無力報 天  
王閏夏蟋蟀早豐年禾黍香小臣慙肉食課殿豈循  
良

九

趨府四百里無論行路難迴溪緣木末飛磴及雲端  
虎豹生風霧龍蛇減浪灘王陽未回馭計日問平安

十

山中無不有樹木拂天長野路垂榴實幽林宿麝香  
將秋常似雨入夜遍如霜試訪盧敖隱看攜五色囊

詣府阻雨韓城

三伏行逢甲子雨蕭蕭哀馬暮何之孤村破屋愁無  
睡中夜淋鈴淚金垂客路怯聞泥滑滑古城惟見黍  
離離浮生天地高歌裏早起盈梳摘鬢絲

還縣阻雨三鄉

長路往來衝毒熱登山臨水詠將歸誰攜神雨行朝  
暮更中雌風病渴饑旬日程期難自料百年身事漫  
多違尋常解組徒虛語惆悵生平出處非

雨中聞笛

孤村風雨淚漫漫  
笛裏關山秋色寒  
多少征人愁不  
盡更教楊柳曲中殘

官署雨坐示阿光

官舍不糞除草木  
鬱森蒼會雨中  
盛生意決明何茂茂  
將秋百物華秉穗  
各無害蟋蟀與丘  
蚓鳴聲資萬籟  
吁嗟造化工楮葉  
宋人怪明明事理  
衡足以別內外  
簷雷滋澗碧泡影  
洩湍瀨屏營對雲  
樹昏黑蚊蚋噓  
光乎汝知之洛水  
如衣帶我聞之孔  
聖濯足以爲戒

立秋閏六月十五夜

閏夏驚時序  
初秋憶別離  
梧桐看欲老  
絡繹最先知  
風雨孤城卧  
山川七月悲  
洛陽頻甲子  
回首去年期

二

鄉關三月信  
羈旅四時情  
短鬢如蒲柳  
空山老杜蘅  
月圓金狻影  
露晞玉壺聲  
飄泊乾坤內  
風梧又號城

秋夜聽雨

草木山城靜  
乾坤夜雨秋  
蕭疎雜砧杵  
斷續赴更籌  
波浪蛟龍坼  
樓臺燕雀浮  
聽潮翻自怪  
萬里一虛舟  
十七夜月下作

久雨霾秋氣空山月尚盈拂雲侵古樹出海到荒城  
清淚嫦娥濕寒輝烏鵲驚兔睛瞻縹緲蟾闕現妖精  
一作莘川客三回桂影明他鄉且創瘡薄宦豈飛鳴  
露電看逾靜虹霓底莫生親朋踈絕久杯酒待誰傾

投贈曹姚二廣文

地遠山深宦跡偏秋花秋樹晚堪憐草生鄭館書如  
帶竹似梁園賦幾篇紫氣榮光浮百里綠文靈畫出  
何年新詩細細憑君和好誰人賞太玄

不寐

十載人事換千山秋氣深蜘蛛縈病髮蟋蟀入鄉心  
草露晴恒濕星河夜自沉多憂獨不寐破月動孤吟

雨

秋雨晚淒淒蒹葭拂水低星沈雲際樹虹度棧邊溪  
笛外關山淚機中夜月題羈人交好寡久負醉如泥

暝

涼飈隨節至暝色帶人來地苦形骸瘦情踈妻妾猜  
孤蓬輕自舉寒藥病還開秋氣先南鴈蕭蕭萬里迴  
秋齋卽事

孤城閨六月秋色幾人家斷續行天雨飄零碎地花  
故園依晝夢旅食待年華寂寂荒庭內空殘抱蔓瓜

別意

昏昏閨中秀揚蛾青雲端結髮事中饋晤言寡憂嘆  
夜合鈔柝葉鴛鴦必雙翰匪惟兒女愛未懷宗祀卑  
龜勉蘋蘩事可以羞玉盤妾人心匪石君子德如蘭  
娛樂未云晏別離良獨難涼飈殄薜華衣裳薄且寒  
常恐捐中道過時貽齊紈蠅蝨間白日讒口生波瀾  
相期在皓首惻惻傷肺肝

早起

幽居堪吏隱早起興微茫蛛網黏蜂藥蛇虺近蚓房  
雲輕學葉綴露重入瓜香烏鵲關何事天河待作梁

秋熱

秋熱蠅蚋亂沙暄鴻鵠飛天時初改律人事未成衣  
漫采他山藥應悲故國薇宦情狎麋鹿何必不如歸

秋夜

獨眠聽地籟寒夜桂叢幽客被螢親夢家書鴈寄愁  
踈星金掌度曙電玉繩收百慮求何事應拚到白頭

秋雨退衙遣興五首

日月不居載陽載陰弁雲被野秋氣生霖苑苑桂華  
香襲我衿獨無好仇以陶素心爰御旨酒爰弄柔琴  
山何高高洛水何深豈伊待人山水知音願言莫忘  
懷哉所欽

膏雨油油零雨霏霏登山臨水望遠將歸巢鷺辭壘  
玄鴈于飛瓜瓞萎黃林木自稀涼氣被帷秋風動衣  
我思東山言歌采薇肅肅倚桐湛湛日晞顧望佳人  
怒焉長饑

鬱鬱崇蘭茗茗薜華朝翫芳榮夕睇空柯隰則有芷  
阜則有麻貴賤差等亦孔之譌雨無擇潤藪無擇波  
魚鱉羣游溝澮盈科采蕘北沼折秀南阿路遠莫致  
悲如之何

煢煢孤鹿十步五還息蹠豐林掛角巖間蓄身不淑  
網罟邁患怵腸俎豆引領崗巒豈其飲水必醴之淵  
豈其食草必澤之蘭思彼嘉賓可與晤言望而不見  
寤寐增嘆

駕言行邁陟彼山椒遙望所思風雨飄飄羣鳥嘒嘒

野蟲嚶嚶七月河廣曾不可  
刀葛藟之枝施於松喬  
蜉蝣振羽熠燿榮宵衆族競時不待後凋孰知我憂  
引睇長謠

遲家書不到

家遙身未返書到病堪痊  
野鵲浪傳喜關鴻先自還  
鬢絲秋草短淚點晚花懸  
忽漫三千里微官八九年

雨霽

秋雨不可盡陰晴相間新  
若無蟬竦出惱殺漁樵人  
草露憎幽徑厨烟會比隣  
季鷹非作達只是憶蘆葦

行藥小齋

秋來未省睡病間更增狂  
行藥殊幽事危花尚暗香  
聞砧和蟋蟀閉閣歇蛩蟬  
誰似梁間燕歸期獨不忘  
去秋行

去秋何在在海隅今秋抱關走東都  
十年令宰豈得意區區刀筆非良圖  
少而至壯轉盼失落落行藏無  
意必鄉里兒郎氣成虹世事翻覆暗如漆  
眼見輕裘肥馬人白日誰知不再晨  
歸來且躡東山屐不惹長安道上塵



歸來引

蚯蚓在堂龍在穴具曰予聖誰能別得時雲雨為何  
 求寄生泥滓非不屑但見悠悠行路兒吞雲吐日交  
 相馳有力負之潛趨走古往今來知不知東海大魚  
 未可釣青天高高日月照拂衣長嘯歸去來逢人不  
 言聊一笑

今夕

不寐牽牛夜年年淚雨多他鄉共織女今夕渡銀河  
 清露繁瓜呆微雲暝薜蘿頻闕兒女節乞得巧如何

秋雨嘆

秋雨經旬陵谷變天中小吏人不見鳧舄乘濤泛似  
 雲龍蛇破浪逝如練三千道路闕舟楫三月音書絕  
 親眷妻兒索衣兼索米僮僕采蕭復采莧無酒那應  
 開口笑無錢何怪旁人賤陰陽晦明本常期此道艱  
 難安得宴

喜錄時事

天王切調燮密勿富經綸繼作殷羣聖同升舜五臣  
 弓旌豈無意彈劾動如神漢主偏容懿明良體統新

擬古三十首 有序

自梁江文通作雜體詩三十首義取通方廣  
恕好遠兼愛而明薛君采王元美各亦嗣作  
雖才情金極體製殊倫亦各其致也夫下上  
千古音滋既已變絕斟酌昔賢警咳固亦逸  
漢而欲使甘辛共味丹素錯采兼工金請情  
至響臻含萬化之變萃羣有之美不其難哉  
蓋優孟髣髴或假貌于衣冠伯牙彷徨獨移  
情于絃韻鬼神忽其將通筌蹄亦可畧諸莊  
周有云小惑易方大惑易性此善言也解乎  
此者始可與言擬古也已矣今依文通作三  
十首不更  
益之焉

古別離

盈盈十五女 軋軋弄機杼 偏偏婉青揚 深深時獨語

矯矯未可調 娟娟要心許 借問心許誰 含羞意不叙  
朝擘薜華枝 夕貫江湘蘼 山海無終極 伊人傷別離  
脉脉淚痕濕 乙乙長相思

李都尉陵從軍

黃雲蔽千里 游子不復歸 胡霜塗野草 陽鳥復南飛  
白日頽西影 奄忽掩餘暉 親知長別離 浪浪涕沾衣  
驟馬各自媚 客子獨無依 徘徊對樽酒 皓首使心悲

班婕妤詠扇

團團素紈扇 君子時相見 出入承皓腕 披拂親君面

盧隱集 卷二  
中道一不諧秋風蕙草變勿忘篋笥惠他日隨所薦  
涼熱各有時恩情爲誰徧

魏文帝丕游宴

穆穆良賓友肅肅會西園華燭浮冠佩星辰殷以繁  
白露被叢蘭纖月赴通川玕膳溢大庖旨酒盈我前  
絲竹激長飈哀響入雲天曲終無一語萬舞何翩翩  
神魚蹈節奮飛纓隨風旋好我衆君子興文揚綺篇  
願言惠明德歡娛保百年

陳思王植贈友

皇佐肆明惠四海悅見休英賢集文昌翩翩信良儔  
我友二三子中和遺悲愁日夕眷佳人聊復秉燭游  
開秋泛白華迴飈飄飛樓芳池激氷井銅雀帶川流  
蟋蟀吟東廂西序飛雄鳩安得縛此鳥天路險不周  
志士規壯圖小人懷同仇顧念無衣客貧賤長悠悠  
懷寶有餘媚嚶鳴必相求常恐蕙草晚景光逝不留  
艱哉道里遠願濟川無舟申章勗爾志聊用寬百憂

劉文學楨感遇

奕奕驚秋風飄飄度飛蓬秋風絕回景飄蓬舉雲中

何異客游子轉薄隨西東元后垂惠顧僂俛奉我公  
自慙非嘉穀黍苗澤已豐翱翔清禁垣白日燭微躬  
常恐先朝露不得攀雙龍所親念未隔何以慰我忡

王侍中粲懷德

昔余邁豺虎竄身于荆蠻荆蠻非吾土客子靡暫安  
桓桓相公業日月重昭宣一怒荒四陲歌舞不得閒  
壯士事行枚婦人悲東山萋萋杖杜生行子薄言還  
葵藿希朝陽燕雀嬉堂間內慙微鈍軀恒願與比焉  
高會文昌觀纓組奉周旋懼無鉛刀効併怔私自憐  
循覽伐檀詩能不愧其言公且負大朝我公胡不然  
巍巍昊天德思懷申此篇

嵇中散康言志

神龜卧靈沼鵬鳥息天池百卉爲春秋瓊樹獨葳蕤  
嗟予抗矯志肆意慕所師常念卒日曷不悟杜德機  
悔吝生夸譽混沌別雄雌漸漬喪外物形影徒相隨  
崆峒拜唐帝華胥樂黃羲我聞上古人德素如嬰兒  
殊俗疇肯安逝將遠去之生生理自致一漑竟欲施  
朝游蘇門山夕采三秀芝營魄守冲虛萬載長自夷

俯喟一世間忽如朝露危願想逢知己杼杼絕乖離  
阮步兵籍詠懷

幽人在何許秋夜一何長桂樹滋白露涼風動枯桑  
蟋蟀鳴北牖螢火入我裳天漢流素影星辰自成行  
佳期獨不見惻惻思斷腸

張司空華離情

亮月麗房幃三星燭幽襟佳人間髣髴精爽越飛沉  
蘭蕙改春華草蟲含露吟耿耿忽忘寐夜中撫鳴琴  
安得瓊樹枝順風貽所欽願飛無羽翼延佇懷思心

誰云山川邈勉哉期同衾

潘黃門岳述哀

四節雖平分秋氣悲有餘淒淒皓露涼日出室東隅  
之子未乖析形神逝焉如衾幘委素塵翰墨跡已渝  
遺香歇灰燼佩帶沉明珠豈獨音徽絕神爽竟虛無  
虛無誰克親哀情寄斯人驚飈卷重幃空床難及晨  
入室盼枕簟恟恍疑爾身爾身往不歸枯荻不再春  
出戶悵若失驅車步東閩高墳何鬱鬱極望涕霑巾  
霑巾思良偶霜露亦已久魂銷青冢間烏啼墳上柳

願張漢帝幄忍鼓蒙莊缶朝命奪私懷惘惘迷趨走  
沉憂日顛倒忘情夫何有

陸平原機羈宦

曠矚多遐躅矯節遺卑踪青宮逮嘉命振纓廁夔龍  
脉脉辭親友循彼江介風假策遵廣術總綏越崇墉  
北徂回枉渚西邁聆悲淙肆目無故物傾耳非吾邦  
脩薄高林翳緬途駭雲降孤獸嘯我側翔鳥鳴相從  
睹物嬰懷思慨嘆鬱填胸承華何邃閔輦冕被我躬  
誰謂遠游易辛苦難爲容歲月歛遷逝寤寐結遺悰

左記室思詠史

梧桐生朝陽威鳳覽其華何限幽谷蘭不殊蓬與麻  
貴賤良有階愚智分無涯鬱鬱楚靈均燦燦賈長沙  
著作豈不達沉淪使心嗟朝遠羊豕間暮升卿相家  
冠蓋何熠燿容耀三春葩於我如浮雲高步凌烟霞  
張黃門協苦雨

陰節月離畢秋序燧改木屏翳黯不收豐隆煽方肅  
山岫湧雲根陵數接雨足鸛鷓鳴高樹龍蛇發空谷  
甃沉濕勞薪瓶罄玦脫粟聒蛙入室處靜鷺緣階浴

塵撼零蕤碧瑟瑟浮苔綠淒風墮芳蕤愁氣散幽馥  
固窮積道基離羣玩物復伊人水一方君子在版屋  
不見惠德音尺牘如金玉高尚無嬰物清修慕沉陸  
茲理孰識察默默縈心曲

劉太尉琨傷亂

騷騷思千里非子脫鹽車英雄慕奇勳疇能察區區  
晉喪苟息貞衛賴甯子愚脫騾亦賢哉石父釋囚拘  
叔向感祁奚白公存伍胥燕丹著白虹荆高皆欷歔  
古人今邈矣悲嘆有是夫皇晉遭屯塞陽九信有諸

中夜時起舞揮涕涕沾裾枕戈以待旦鷄鳴問前途  
時乎不我遇狼狽在須臾忠孝兩不立白日忽西徂  
玉石豈辭焚釁孽尚有餘烟塵困輶張長嘯空踟躕  
盧郎中諶感交

梗梓生南國匠石擦斤日騷駢罷峻坂長號郵無恤  
內慙駑蹇姿更益不材質運會際英乂嘉命諧所暱  
欵誠申婚媾歡若膠投漆伊昔邁顛沛王室師喪律  
造次望公歸周惶惕如失謬忘其短弱合契和琴瑟  
寄身委知己險易要如一中更罔克諧反顧戀良匹

慷慨希高躅撫心愧名實耿鄧光漢京管晏獎周室  
勗此弘濟彥大任降疾疾徽猷允敷宣經綸草昧術  
皇穹牖忠貞人定勝者吉馳情眷君子含酸貢詞筆  
郭弘農璞游僊

長安游薊子蓬海潛安期羽化入杳冥千載不復來  
環丘拾蘭葩瑤池衰丹萸順風拜姑射燦然冰雪姿  
游女解環珮相靈時金栖青鳥復還歸但傷塚壘壘  
陵茗含朝華歲暮將安之逝當練玉液飄飄翫蓬萊  
孫廷尉綽雜述

氤氲二儀著混沌固有準道喪生仁義情遷物則引  
動息寄飛躍行生根玄牝澹乎至人心宵然遺形朕  
止水清顏瑩期月素懷盡憑化衆欣託胡爲分靈蠢  
藏舟旣密移生生若朝菌大鵬運南溟澤雉翔壟畛  
亶亶機莫隱小大由性允尠義傳廣成微言析關尹  
去矣寥廓鄉將肅無何軫

許徵君詢自序

迅節羲和馭危魄望舒影大患有吾身悲襟未能整  
臧穀旣偕亡蠻觸徒虛騁濁難交怵迫弱喪中心柄



與思養谷神超然詣靈境神飈拂三秀瑤液生丹井  
玄雲入石罅虛白發清罔豈惟塵慮冥恍惚四大屏  
灑落逃自然百年謝俄頃揮手凌紫烟御風超溟泮

殷仲文興矚

清秋肆遙目物化含虛曉皓露溥蕙華鮮虹飲深渺  
隕葉無後凋徙倚長松標薄言紆塵襟稅鞅躋縹緲  
勝賞不外邁心期寄雲表穢累旣已滌惑吝將復矯  
水涸天根復草靜羣山小何以散蕭懷憂來方悄悄

謝僕射混游覽

良游難屢邁四運行俱休美人思不見采若遵芳洲  
願言興無違雙關對雲浮阡術帶層崗白日隱高丘  
光風被蘭蕙榮暢澤自周鳥情悅芳樹魚沫欣閒流  
徙倚慕所欽逍遙增我愁漆園有狂士樂此濠上游  
誰能坐窘迫徒令懷百憂

陶徵君潛田居

結廬依山宇種豆苗苦稀連隴秋草盛皓露沾人衣  
田家勤四體秋成良所希更有一觴酒可以陶夕暉  
風物晚澄豁稚子荷篠歸白雲止我牖昏鳥相與飛

且復樂此懷明日無所違

謝臨川靈運游山

丹霞啟靈區陽景耀僊宅道以賞心延事爲探奇適  
懷美稅塵鞅晤言淹游展石門抗疏峯銅陵羅瑤席  
澗瀉泉溜丹嶂隱林氣碧西曛映東嶠南術綿北迹  
朱鬘浮神井青禽弄修翮歛吸覲霓車髣髴逢羽客  
聆音契所宜覽物察自昔惜無同袍士娛茲清暉夕  
澹澌寒雲交舉秀芳條械繕性以忘累抱一自預積  
居常屏戚慮合歡謝探蹟百年胡不怡佳期庶靡隔

顏特進延之侍宴

斯干協占吉湛露戾夜留汾游載詠漢鎬宴夙歌周  
化人闢瑤殿紫微麗璇樓神飈丹甍欵僊露金掌浮  
睽雲升皇陟聆漢咸韶悠東曬避陽景西睇延素秋  
翬騫聳藻井龍躍愉芳流皇美肅瓊軫接席筵玉球  
睿情停萬舞天眷佇神謳人神暢悅懌侯甸晉懷柔  
蓄思洽德禮騁盼窮遐幽鱗羽若惺化瀆嶽被嘉休  
弱賤邁多幸陳詩述何尤詞非栢梁艷良慙曼倩儔

謝法曹惠連贈別

別離迷近遠行役渺無期束裝待明發蕩漾懷所思  
屢嘗徂征候辰良迫已遲揚帆凌春岸挂席驚江湄  
覽物靡故歷傷離懷古心別鷗翔南渚寡鴈鳴北林  
哲兄遠相送眷眷申同衾汀曲判客袂淚下誰能任  
朝旦發浦陽夕次荒江眇沙禽命侶吟猿猴接臂矯  
搖搖行邁心悵悵長路眺棲薄方汎汎淹留轉悄悄  
悲來感物奏春仲歎緒風層雲冒沙嶼密雪灑繁空  
艤棹望四野合歡誰與同石尤絕行子戚戚勞心忡  
風波悵何適佇楫別情延客鳥眷故枝游子念歸還

他人各有慕我獨無與言徽音幸遠嗣抒憤申微篇

王徵君微養疾

山中望佳人長帶攬女蘿蕭蕭楓樹林湛湛江之涯  
鷓鴣鳴天風鴻鴈夜中過徙藥瀟湘沚鼓瑟帝子家  
惆悵杳誰卽娛樂奏九歌采珠結成言報之以芳麻  
懷思徒震蕩歲暮勞何如

袁太尉淑從駕

龍游鷁六氣鳳蓋扈百靈宗廟穆秩典粉社凝睿情  
春秋肅榱几神祇降休明孔鳥揚後乘騶虞媵前征

翼衛拂濛汜歌吹佇繁纓中流河伯獻極浦洛妃迎  
祈年太乙誑表瑞竹宮輕逸愉浹昨隸恩渥服嘉禎  
陳詩王迹續省方侯度程蘭徑騰風軫芝房眷露莖  
馳邁八駿跡陪慙駟牡聲天惠良未艾末奏竊所賡

謝光祿莊郊遊

出郊矚四野言越垌林垂黃鵠矯雲際鳧鴈唼沙湄  
涼颼奪蕙葉惠露泫蘭滋江渚白日隱佳人凝在茲  
石磴響虛牖松澗溜曾坻丹霞忽容與神嶺遠蔽虧  
岸猿丘中嘯匹獸杖前移平生投簪願整褐方自斯  
靈區彌徙倚松喬終果期

鮑參軍昭戎行

良馬騁逸步烈士矜盛年左右挿彫服遠上太行山  
扶桑倚長劍殺氣上參天鞍馬照秋日八月燕支寒  
斧石方得火鑿米始及泉驚沙沉鉦鼓枯骨埋荒烟  
小人志溝壑君子思喪元漢虜均勝敗我軍幸獨全  
寂寂百戰後誰知飛將賢徒見當路子銘功於燕然  
休上人怨別

佳人處天末秋夜有所思桂華汎皎月清風左右披

閒隙流皓露天河鑒虛帷縈絃無餘響步櫺苦遙悲  
巫山碧雲暮湘江芳樹滋鴻鴈終夕至之子殊無期  
懷哉石上英采之可貽誰

代蘇屬國婦

君子在萬里數載眇相思結髮篤恩愛不謂長別離  
秋風西北來飄飄動羅幃鴈足繫帛書上有訣絕辭  
漢節久零落胡霜如鬢絲妾無鴻鵠翼安得遠相隨  
虛執白頭約空負皦日期

盧隱集卷二

盧隱集卷二

東海高出孩之著

述征詩

四言  
五首

蕭蕭遄邁逝逝靡寧修嶺造天雲物四冥晨發空谷  
夕宿韓城衰草被野落葉沾衡

昔我戾止桐華載陽今我斯征紅葉離霜淒淒緒風  
泠泠濛雨彼居之子則庇其宇

將將黃鵠鳩彼六翮腹背之羽雖多何益嗟我好修  
匪無良朋顯者莫與曷之同升

莫往莫來古人有言仕無中人不如歸田為山就高  
為水就深誰忘俯仰永念同心

秋蘭在谷豈忘朝日桂樹有香誰云不實采桂如何  
將貽遠者采蘭如何獨臭中野

效四愁詩 有序

高子治盧氏六月政頗通簡百姓柔服是時  
箕星見大水海內困敝倉廩虛間闕愁嘆內  
議煩碎非急是競余幸進不關得失之論待  
罪罷邑猶得斟酌緩急布上之惠乃不任  
整婦宗周之恤位卑不  
可以言作此託風焉

我所思兮在蓬瀛長鯨中奔弱水橫望佳人兮隔九

秋願言贈之珊瑚鈎斬鯨涉水行且休思託青鳥展

我心安得翱翔遺好音

我所思兮在蒼梧虺蛇中處洞庭枯望佳人兮隔九  
疑願言贈之琅玕枝涉彼江湘行且辭思託朱鳥銜  
尺素重華不來空相慕

我所思兮在西岐虎豹中絕羊腸危望佳人兮隔九  
河願言贈之瓊玉珂驅馬二華行且過思託鳳凰乘  
高崗羽儀不見空斷腸

我所思兮在薊丘易水中阻雨雪流望佳人兮隔九

關願言贈之英連環驅車太行行且還思託鴻鵠翔  
天衢路遠翅折增煩紆

輕薄篇

輕薄誰家兒翩翩洛城裏咳唾羽翼生叱咤風雲起  
意氣干白虹寶劍明秋水四海有故人姓名許借爾  
使酒罵魏其倚勢調當鑪百萬買鞍馬千萬爲樗蒲  
英雄自一時齷齪非吾徒寧知倏忽間白日薄桑榆

行路難

十五首效  
鮑明遠體

朝看熊耳晴暮看熊耳陰熊耳陰晴不自料浮雲天

地本何心人世幾回看熊耳熊耳萬古闕人深陰谷  
多積雪陽坡興愁霖西有虎豹嘯東有猿猴吟清水  
流離不可上行人一度一沾襟

北邙之山蕭蕭鳴白楊下有千古貴人骨遺甕斷瓦  
自相當北山石槨亦不固雖有漆椁何足藏朝出金  
盃玉匣之奇玩暮發梓文銅格之異章白骨已化爲  
土灰陶者埏埴乃得將黃河之水流湯湯古人已死  
今人斷腸

三月三日百花明游人相逐出洛城中有一女名宓

廬隱集 卷三  
三  
妃順風逍遙體態盈佳人遺我明月珮願言報之白  
雲英汀有蘭兮河有波同生死兮矢靡他浮雲奄冉  
流光滅芬芳愉懌奈樂何錦瑟莫彈陽春曲此曲哀  
傷感情多

君不見丘中蚓雨過清吟動幽戶神龍雖上天行雨  
變化何勞苦神龍不足道而况蛄蟻之丸鴟嚇鼠流  
行坎止委定命廣欲多求遭世侮中庭芍藥敷春華  
爛熳隨風落誰家寧作九月之萎草不願三月之飛  
花

對酒彈長鋏金匱玉筋中不慊拔劍斫唾壺歌聲未  
斷風雨接我昔弱冠二十年自矜英妙才燁燁天上  
浮雲手可攀萬里奔虹足欲躡落魄十年三令尹擎  
拳曲跼羞妻妾入室交問但言他內熱左右增赤頰  
天路旣修渺大川良難涉念此勞勞利達爲何求已  
矣歸與咏匏葉

阿閣誰家邃重房綺疏璇椽文杏梁女兒嬌小字蘭  
雪微顰對鏡怨春陽朝愁遲日薰碧草暮惋微風拂  
弱桑乍憐彈瑟停五馬不見吹簫下鳳凰牽情縈恨



未敢道含嬌宛轉空斷腸

君不見薜華何歲蕤一落無復還故枝又不見上天  
照下土朝陽正杲杲夕暮興雲雨萬事反覆難自保  
貴賤壽夭等高草昨暝同堂歡讌賓今晨奄忽他途  
道登榻辭履鞮撤筵別尊壘一朝死瞑去笑口何時  
開君當快獨飲美酒年華電露焉足哀

君不見東家翁六七十猶種田粗衣糲飯愛惜費  
橐金貯帛期千年寧割身上肉不解囊中錢有子年  
十五遨遊何翩翩居常願父死老眼詈皇天宛其死  
矣他人愉三月房基生荒烟豈惟之子不負荷造化  
惡吝兼嗇全覩茲噉噉彼翁生何太苦死蒙憐丈  
夫犖犖當怡悅華屋傾杯如流泉

倉庚莞莞懷春鳴偏傷思婦幽閨情憶昔與君初離  
別不謂經年阻歸程鉛華屏御首蓬亂含意待君誰  
見明聞君初隨陽翟賈迢迢行過邯鄲城昨有馬行  
客寄言君結新婚盟聽此令人增恨惋閑房悲嘆有  
餘聲况睹燕燕雙棲宿蝴蝶翩翩戲春英新人如珠  
玉舊人如塵土妾如出園草又如墜天雨剖我明鏡

裂羅襦君孰知今妾心苦

樹棘不獲黍乎梟不生鸞胡爲世間人傾側反覆  
難端錯也旣刑絲亦死魏灌坐守殺武安出爾反爾  
一間耳誰令好禍自摧殘盈虧晝夜有定理念此嗟  
傷使心寒

君不見雲臺何高高平夷荒涼生春蒿君不見金谷  
人如花流泉蕪沒藏龍蛇洛陽黃金齊北斗歌鐘舞  
袖爭春華惟有北邙松栢樹斷送城中百萬家

孔子盛德士匡人將殺之公旦造周室管蔡乃不怡  
况於我輩狂愚人安能詭隨齷齪與時宜蛾眉畏嫉  
怯入宮矜惜玉顏長相思私自憐兮可奈何綿憂沉  
恨如朝饑

猛虎尚可狎結交難得真須臾有改變何況白頭新  
朝爲平津客暮登廷尉賓張耳深望刎頸友呂祿被  
賣肝膽親強比聲勢膠投漆但失錐刀參與辰心之  
不同如其面伏寇在側耳屬隣流覽今古長嘆息寄  
謝悠悠輕薄人

君不見邊庭三月雪如花戍卒四十年無家同伍長

幼半鬼客白首委骨長咨嗟亦聞漢虜和親成河西  
新築受降城黃雲慘瘦白日死胡馬酸嘶首菹生况  
復三年缺軍餉鶉衣枵腹應空名朝糧摘榆葉夕蘇  
啖草根不得見妻子况問舊廬園男兒苦莫苦兮遠  
從軍聲出更吞復何言

意中忽不懌攬衣起行游春華何沃若中庭安石榴  
此物花繁不結子落英飄蕩逐東流中心含愴欲有  
訴臨鏡已愧紅顏適世事不由人人生何用多苦辛  
蔡澤富貴其自有陳平安得長饑貧得時屠沽奮廊

廟失意志士等灰塵遭世坎壈復何道譬諸草木違  
陽春安能偃僂事俛仰躑躅嚙如婦人諸君請靜  
聽賤子言勿嗔松柏霜雪乃見性蛟龍雲雨始致身  
直須流浪適志意暢懷縱酒得其真

### 大淙詞

大淙者龍神也邑邑旱禱雨不得乃召其神焉  
雲若湧隨雨遂暨溉神之德其盛矣乎爰作  
楚歌命巫  
報祝焉

山中兮紛若思夫君兮獨處廓望桂旗兮偃蹇安離  
合兮金作采衣兮連蜷玉璫兮瑤席愴將上兮又宜

下芳雜糝兮孰要予傳芭兮折麻魚吹兮鼉舞萍何  
號兮水滌借豐隆兮騰逝日將暮兮不我聊水湛湛  
兮天蕭蕭寥靈車兮後來命飛龍兮要之羗延佇兮  
總總况雲中兮參差

右迎神

葯室兮蘭堂薜荔幃兮旣張子穆穆兮顧予靈儵忽  
兮相羊蛟何躡兮庭際魚何萃兮空桑紛流澌兮潺  
湲光風被兮榮蘭靈娛樂兮未晏憺夷猶兮獨不言  
驅回飈兮如怒予文龜媵兮忽而下葛藟蔓蔓兮石

淺淺白蘋華兮汎北渚翠蓋兮陸離飄欲去兮復後  
來時冉冉兮容與聊淪惻兮寤懷

右降神

靈曼膚兮旣懷凌飄忽兮安歸令河伯兮前導結芝  
旗兮荷旒駝高翔兮雲中將還返兮貝宮駕駟螭兮  
馭風驟予乘兮蟠竦原隰兮靡蕪荇參差兮飄華夫  
人兮長無愁苦神魚媵兮風以雨解佩帶兮詒言與  
子期兮洛之浦邈佳期兮浩蕩長成民兮終古

右送神

詠史詩

十四首

生人厥生初  
猿狖遺其情  
木石與鹿豕  
自然與道冥  
孰令混沌鑿  
耳目遂營營  
堯舜鑄糠粃  
周孔闡休明  
聖矣而未仁  
治亂以代更  
馳驟遠沕穆  
江河日東傾  
軒皇不可作  
夢寐思大庭

二

泰伯隱三讓  
至德先周文  
一物脫西伯  
三分終事殷  
軻氏推難王  
歸之賢聖君  
何以彰幽燬  
征誅代紛紛  
義士扣馬諫  
大義千載聞  
盡美未盡善  
折衷於子云

三

趙盾驟諫君  
將朝猶假寐  
盛服却鉏麇  
慷慨觸槐斃  
簞食翳桑人  
倒戟報深惠  
爲德豈在明  
恭敬身之衛  
惜也法受惡  
二子金垂世  
靈輒耻居名  
清風有餘地

四

延陵振高節  
飄然聖之清  
北使觀周樂  
辨微何至精  
平仲旣納邑  
文子屏鐘聲  
獻縞如舊誼  
挂劍表深情  
龍德夫誰測  
千秋季子名

五

六雄既不競中原血狂秦號令驅風霆鞭策泣鬼神  
長城築人骨萬里白嶙峋其利在後世怨毒叢一身  
翻思不死藥填海以東巡乍驚博浪椎已化沙丘塵  
輶車鮑魚亂三泉鳧鴈新徒令千載下憤悼多酸辛

六

子嬰死壁觀未償六國冤新安僅一坑四海骨方寒  
人事信酷毒天道則好還項氏有十罪不若分羹言  
英雄詘詐力成敗或更端嗟哉狗目論詠慨激我肝

七

惟漢平原君伉直無忮求咄喏以母故委身辟陽侯  
志士多信心蹈道恒不周誰能已然諾殉知終見尤  
其事不足論其人劇孟儔

八

鼂錯本深人袁絲亦奇士六國初發難智囊送東市  
廟堧旣以毀自將憂天子術數何其踈厲階實兆此  
絲也飲母苛脫身白刃裏浮沉逐雞狗全生得至理  
禍害好循環出爾終反爾郭外之見戕嗟哉如或使

九

翩翩魏公子執轡御侯羸徘徊立市中列國高其行  
漢庭卿相會垂死老王生廷尉跪結韞賢重於公卿  
折節風日邈詭故猶釣名家寥寥懷此人聊傷貧賤情

十

公孫溷羊豕六十未見知焱起遘運會日暮勲名馳  
主父客齊趙諸生奴辱之片言合主意公等見已遲  
鼎食則大橫布被用守雌詭遇多暴貴雖兼賢達規  
差勝齷齪輩未爲壯士嗤

十一

長卿旣倦游滌噐對當鑪詞賦聞人主同時得相如  
及奏大人頌飄飄欲凌虛文章庶幾遇千秋有是夫  
偶從西南使縣令爲先驅絳組良非願寂寂茂陵居

十二

武帝何雄哉冠軍紛四馳西絕榆谿塞北涉踰月氏  
休屠內稱臣封侯如列碁衛霍有天幸李廣獨數奇  
漢恩亦已薄千載令人悲

十三

炎德垂將燼朝廷如沸湯陳實事不密玉石遂俱傷

廬山集 卷三  
大厦之拉攏一木安能長嗟哉衆君子膏火自相戕  
顧厨與俊及四海罹餘殃網羅彌中野鴻鵠獨高翔  
千載嘆明夷殷鑒慎毋忘

十四

晉室奔胡馬中原淪腥羶祖劉方戮力沒齒終偏安  
金人已渡河宋庭議多端崩避若走兔舉族陷北轅  
天下勢而已西北如首元煌煌大明業北辰臨朔  
燕亦有土木狩及正長晏然規模邁萬古社稷篤  
忠賢鍼芒慎蟻穴百世永配天

秋雨詣府道艱晚抵故縣作

秋期山川負于役縈悲襟側瞰無底壑岿嶢仰飛岑  
淒風動幃軒零雨灑素衿南澗駭雲流北汜奔霧沉  
潢潦從橫至谿路薄嶇嶽舉趾踰九折背武凌萬尋  
猿猴答哀響鸛鷁翔浮陰丹實斂野蔓華葉辭鮮林  
禾黍屢遺秉饑鳥戢翰吟夕次荒廬宿離思孰能任  
淙淙寒雷交馬鳴夜森森匪惟瘁昏墊用怵垂堂深  
王子過回馭識幾著來今知命不怨尤濡翰陶我心  
次夕渡洛止村邸作



室處厭喧囂在旅思聚歡淒淒風雨辰頓覺衣裳單  
理棹驚洛汭川后生層瀾驚飈卷匏葉中人忽凜寒  
僕夫泥沒骭馬痛陵險艱內惕乘者殆復勞行者難  
屢躓增煩懣冀慕一枝安村舍擁竹根視如厦屋寬  
伸膝獲共庇足明止足端牛羊鳴虛囿蟋蟀聾寒山  
啾啾鷄和唱中夜撫枕嘆願歸無翅翎百憂如循環  
急難感儔侶庶毋忘一餐

楊明府招飲留贈

經險戒方肅改服天宇涼溫溫主人惠芳宴羅醴觴

笑言諧暢洽絲竹度清商庭榴綴丹實時菊苞幽芳  
夕景撤繁翳復睹衆星光爲樂及此時一賡湛露章

阻洛候渡

洪河流日夜扁舟忽在眼榜人戒夙暮已復洲渚舛  
弭節波浪慳稅鞅天地轉盈盈益蕭森脉脉待清淺  
油雲冒曾巘潛陽時一顯原疇委穗湮林篁雨葉泫  
野墻蔓蒺藜繫纜滋苔蘚征役愆未已信次思不展  
忉怛寧予悲臨深庶知兔不見拒津子滔滔隨所遣

龍頭山

傳是龜  
出書處

絕津稅秋駕策杖復此游茲山何亭亭積翠延凜秋  
仰凌百仞梯俯閱萬里流陟巔御長風身乎如雲浮  
傳聞靈龜出開闢錫九疇逝者如斯夫榮光亦已收  
神禹乘四載而我無輕舟懷古嘯儔侶顧望但增愁  
前者吾不見後人行俱休荒宮翳蒿草碑碣卧犁牛  
感事信所勞畢生爲何求日月逝不處天地空悠悠  
繁詞意安叙因詠遂成謳

雨渡洛漲

白日匿莽蒼山川自翬屨艤艦千仞峽鼓棹違所歷

流洙呂梁迅如馬灑灑擊雲雨翳無象風水自相敵  
岸林遠更合衰葉卷復析大川幸利涉旣濟中猶怒  
小臣昧幾微春秋理有惕明明帝堯仁警余豈胥溺  
吁嗟吾道窮行役長憂戚殷勤謝舟子爲我發河激

喜晴應禱

愁霖涉二旬繁陰翳東都黍稷不復實潢潦墊原塗  
鴻鴈載噉噉萋楚適無虞殷憂禱羣望感格在有孚  
人願天克從義轡回東隅崗巒翠相拱草木森如扶  
飛蟲晞微雨蜻蛉自鳴趨朝菌吐寒華灑露與之俱

庶幾造化仁不違於桑榆整衣曝秋陽爰樂命酒壺  
秋深

清砧聞日夜秋色暮雲邊遠岸兼傳籟高齋忽有泉  
斷蘆銜警鴈衰葉墮驚蟬雙淚他鄉日童兒亦解憐

重苦雨

三秋底事愁霖積山自蕭條水自寒葉濕涼風不肯  
下泥封后土幾曾乾生憎潢潦空城閉早慮崔嵬行  
路難聞說京師天下本 君王大賚遍長安

留侯祠墓

黃河遠抱北邙山辟穀仙人去不還一片留侯祠下  
石也如黃石在人間

二

多少芒山山下灰赤松已去白雲來年年來往人間  
世洛水東流更不回

洛中感秋

紅樹邙山路西風颯已驚東京有遺事遊客不勝情  
金谷銅駝地周公召伯城二毛動秋興三十豈成名

二

浙浙鳴秋葉蕭蕭掩客扉  
雨青嵩少遠霜碧澗瀝微  
王霸曾龍戰關河自鴈飛  
由來不在險覽古興多違  
八月十五夜邀同僚佐飲王鴻臚園

傲吏心期濶佳時逸興存  
芳池習氏館修竹孝王園  
久雨雲恒濕羣星月暗吞  
兼葭捎細幌蟋蟀動幽軒  
往矣臨川屐悠哉庾亮罇  
天高含獨鴈山迴應清猿  
僚吏人皆達狂奴態可論  
紫薇香野席紅樹帶墟村  
樓靜高卑影沙平遠近痕  
一觴忘客思五斗戀君  
恩明晦看如昔陰晴互有根  
坐闌倚叢桂長嘯滿乾

坤

九日

山城不見菊花開  
步屨高齋晚自迴  
海上獨應鴻鴈到  
籬邊賸有白衣來  
洛河寒映尊中物  
熊耳遙當席外臺  
昨歲故園攜手客  
茱萸千里一徘徊

落葉

落葉有底事隨風西復東  
乍飄吹笛裏細應擣砧中  
客子身何繫佳人淚似紅  
依根還滯雨猶勝一飛蓬  
書事二首

逢迎寬小邑愁坐對高臺議論多新體 朝廷滿異  
才官僚曾具矣 明聖自君哉萬事頻年改書空首  
重回

二

妖星滅何日移歲警前朝始發金錢助無妨玉燭調  
秦中方鹿駭使者莫豺驕強項原賢令優容漢主饒

冬日雜詩

感時觸物比興微妙過而存之以俟君子陶淵明有云今我不作後世胡聞哉

羣山淹廢道萬井近孤城天地如虛警風雲忽怒生

寒鴟饑自下野鹿和相鳴僻絕踈人事新知聚散輕

二

落葉門恒擁頽沙岸忽崩野胡驚夜柝山鬼弄寒燈  
灑落交情減哀憐俠氣增匆匆天際日焉得繫長繩

三

俊鷹寒自獵野雀靜堪羅霜雪嚴城閉豺狼落日過  
談諧時不識寂寞道如何虛有解嘲作應慙據地歌

四

大谷龍蛇蟄寒雲虎豹欺川冰明淑浦山雪豁籓籬

猴見如拳小鳥驚接翅甲全生各物理隱見亦多奇  
五

海鷗應不到海鴈幾時來凍井垂甌澀童山伐木哀  
前賢存大體近代自多才賈誼仍年少長沙久未迴  
六

古木生雲氣迴巖逗雪聲兒童記世事貧富見交情  
留滯千秋淚文章異代名故人那在目踈懶廢逢迎  
七  
擁褐時杯酒孤城動夕春 朝廷勸太僕權便許司

農四海長無事羣臣自可供杞人憂不驗 聖德日  
從容

八  
城垣六七里井屋兩三家八月秦山雪諸陵漢代霞  
附書思俊犬伴食識馴鴉自起牀頭舞芙蓉湛斗華  
冬夕對月

冬月千家滿寒光四照同姮娥宵淚濕烏鵲夜棲空  
露暗銀甌井霜飛玉杵宮遙憐獨宿妾華首定如蓬  
過永寧感楊明府去思有作

往來不分經過異何武於今獨去思郭外栽花還對  
客路旁騎竹尚迎兒地隣召伯曾留樹淚墮羊公自  
有碑最念故人虛邂逅河山蕭瑟暮雲悲

遊靈山寺作四首

近山城外俯蘭若上頭居陵墓東周徃雲霞後漢餘  
槎浮疑貫月泉漏瀉歸虛笙鶴何年事飄飄恣所如

山上有泉其下無底  
一樹橫之若槎云

二

洞古疑開闢泉疏洩混源浮萍傷客寓落葉悟禪根

霜雪還依石山河自到門此生憑幻跡今日且清罇

三

地僻披懸徑冬晴醉落霞纖雲生法座清吹上虛槎  
日隱三珠樹霜飄十月花洛流衣帶濶鷗鳥弄寒沙

四

修竹透迤合同游快互招雲峯開躡屐風葉墮吹簫  
何事天垂暝如聞海忽潮雙鳧歸縹緲冉冉別王喬

望錦屏山

名山睥睨接孤城縹緲飛空一草亭層巘朝銜千仞

翠列屏冬俯萬家青烟霞似借高高潤松栢兼吹洛  
水醒忽漫風沙獨惆悵官閒應愧此山靈

雪

初雪融微濕涼風逆更沾羣峯時一變雜樹密相嫌  
酒力醺移几詩情入捲簾空齋對妻女頻擬水晶鹽

冬日漫興三首

野樹雲深天盪摩清齋披髮影婆娑逢人忌諱詩篇  
減對酒生平感慨多憂國力微中夜舞望鄉愁絕遠  
游歌時時鬢粟城頭起吹徹層冰斷雒河

二

烏啼鳴嘯慘寒陰水閣山樓自古今忽雪羣峯皆破  
碎如雲萬木一蕭森棲遲誰借途窮淚留滯方知歲  
暮心天地蒼茫各無語細憑深酌助高吟

三

日短天寒鴈鷺饑野深人少虎狼肥開林細路依依  
出鑿屋懸崖落落微彭澤八旬情已厭淮陽十載願  
多違寥寥人事生悲憤幾處關山空夕暉

答寄董長孺社長



問我新詩好從游自少年鯤鵬雲九萬鴻鴈路三千  
吾晚差知白君才善守玄也應繁露作不讓色絲篇

二

十年猶令宰千里間寒暄白社人誰長青山道自尊  
嵩雲度行縣海雪落窺園何日看松菊春風到綠樽

歲晏行

北風其涼雪其雱歲旣晏矣感恩腸山有獸兮獸有  
行思我所歡不在旁作者古人游八荒我何搢搢獨  
履霜黃鵠千里一翱翔猛虎處卑爪牙藏似我吏事

非其長鞭扑糾纏安得滅野人逐鹿彎弓桑攘臂欲  
從不可將熊耳嗟我日月蒼去家三千道里長昨者  
二僕來故鄉明發送之涕滿眶國家患貧煩議論  
朝廷大體頗未詳吏隱合在山之陽博山自藝有名  
香高歌引領心煩傷

苦寒行二首

山川歛仄軋冰雪鳥獸無聲天地裂羣雲凍折古木  
泣玄窟千尺老蛟蟄空城米價劇太高無酒無褐首  
獨搔妻兒不言勸歸去面赤耳熱愧汝曹

盧隱集 卷三  
雒水一丈冰八尺玄陰泪弗四方白虎豹索食生向  
人鳴鴉啄雪深留跡男兒壯歲無所成不如抑首服  
巾幘不見虬龍隱長松時哉時哉爲誰惜

盧隱集卷四

東海高出孩之著

悶坐

玄冬臨絕遠萬古動遙悲靜入歸田思喧微辟地期  
蛟龍亦一物揚馬不同時寂寞堪吾道悠悠好向誰

後雪

山雪忽易盛山風飄轉多垂空天一象薄夜月同波  
密樹交寒影層冰汨夕河袁安自高卧門巷有誰過  
和陳沔池少壘憇龍門觀作

羣峯遙帶白雲微黃葉蕭蕭鴻鴈飛古殿陰森餘斷  
壁舊家宛轉半空扉重來省斂人相繼前日題詩客  
已非謾說登高能作賦大夫何以恤痾痲

迎春東郊十韻

山郭晴暉永春迎兩度年柳條不忍折花勝爲誰妍  
嶺疊雲非雪溪融水欲烟塵埃疑野馬物色帶啼鶉  
士女妝相妬官僚席屢前賜酺恩已遠薦茲俗猶傳  
丸索呈神技笙歌奪錦纏時時驗學稼處處劇開筵  
小邑春無擇他山客可憐行年忽及立回首悵茫然

盧氏官署守歲

山靜羣雲白城春百物新桃符看又改椒頌欲何陳  
歲月虛相逐兒童轉益親夜闌珠斗爛鄉夢十年身  
人日未寧道上

人日悅暄暖長途無與懽春風不可極物色許誰看  
薄宦幸中土虛名慙具官同人時序改休擬待彈冠  
旅夕春月有懷

竹漾千家月花深百里春客途憐節序旅夕望星辰  
尺寸慙無補乾坤自有人那能卽引分不薄主恩

新

春日寄懷友人四章

長離高飛於彼天衢鳥集其羽於彼枌榆春日載暄  
采薺樹護言念之子好音勿諼

視彼庭矣王瓜生矣春草英矣嚶其鳴矣神志清和  
曠如新沐我思匪遠懷哉空谷

鴛鴦踽踽在洛之下天陰波寒幾不如舍山有栲栳  
隰有蘼蕪穀我則多告我則無

火無焚景寒不結風情罔有極形是易窮雖無東臯

以先尺素令德令聞慨焉長慕

寄李若蒙

蕭蕭中庭栢高枝霜雪燦何意小草心蔭茲千尺幹  
美人不可卽長歌白石爛臨洛理方舟芳草生春岸  
攬之遺所思不異青玉案願飛無羽翮喟焉增浩嘆

又

望望夫焉極策馬悵無之高崗塞四野虎豹縱橫馳  
予爲櫪下駒君作雲中夔齊意在皓首彼此各一時  
自憐薄命妾而矧非蛾眉相思縈心曲歷亂如紛絲

宦情

相識滿天地悠悠空復情  
山川自今古日月閱陰晴  
芳草王孫道春花召伯城  
歸來三徑內五柳一先生  
數雪

雪盛春猶數天虛晝不聞物情  
占細草客眼送空雲  
風起羣山錯川鳴兩岸分  
扁舟憶滄海點點白鷗羣  
後雨雪

春歸花負艷陽期十日陰雲細  
筵疑不是關山楊柳  
地翻憐雨雪海棠時  
袷衣怯薄衾枕亂餐食將寒烟

火遲分似鄉園飛早絮還嗟鬢髮颺輕絲

遣興

春山縹緲隨清興碧草萋萋麋鹿呦  
束帶折腰生不  
了抽簪搔首迴增愁樓臺高少中天出  
雨雪黃河萬  
里流強進一杯三嘆息飛花垂柳晚悠悠

又

春來風雨亦無期萬事蕭條未敢知  
出宰生憎久蛇  
足入宮何處著蛾眉兒童熟狎惟三徑  
賓客同游彼  
一時洛水秦山獨悵望啼猿嘯虎莫深疑

小寒食

辟地孤城自解嘲蕭然寒食望林郊堤沙蟠穩龍蛇  
窟墳紙銜漆烏鵲巢客燕山川歸後翼垂楊風雨折  
餘稍故園花發無人見腸斷微名久繫匏

戊申歲余年三十摘髮見一莖白者感賦

春城滿樹鬱晴烟客裏清明倍黯然雙眼空遲積薪  
日二毛還早種花年儘知蒲柳秋難望遣覓芝苓晚  
尚愆歸去白雲滄海渺樵柯漁艇卜終焉

春日九首

風塵鬱鬱開襟少天地春迴河洛深蜀鳥秦鳥遠相  
喚桃花柳花飄不禁索縱琴書堪辟地好要山水共  
知音帝京何限少年子聞道清時還陸沉

二

簿書鞅掌自支離二月郊行勸稼遲遠水孤舟明月  
帆空山懸屋白雲帷草侵微雨沾題筆花逐輕風落  
譜碁身世偶然聊爾爾傷春怨惜者何爲

三

早乾終日黃塵合不分春風妬牡丹可惜名花還一

折知他傾國爲誰歡麝香林外常時見熊耳樽前幾  
度看未是吾衰甘小邑更無清夢到長安

四

九農比歲嗟雲漢六事空煩禱舞雩卽恐來牟春後  
盡那教雲雨望中孤杉鷄粥粥看偏慣桑扈交交聽  
不殊四月山中期杖屨可堪填委久踟躕

五

行年三十滯周南土木形骸本不堪百濮兵戈新舉  
燧五湖舟楫待投簪灌壇雨過桑麻好莘野春深稼

穡諳聞道潘安人似玉河陽縣裏二毛參

六

萬壑千峯春事遲羈棲閉閣卧經時已憐對酒非前  
日何況無花空折枝萬事 朝廷休浪逆百年身世  
那多知朗吟搔首思公子風雨蒼茫一賦詩

七

僻寂不妨稱吏隱高齋迴互萬重山琴中流水傷心  
白竹上浮雲照眼斑欸欸殿春餘芍藥依依對酒勸  
綿蠻莫傷賈傅長沙遠宣室何曾不召還

八

雷電拂城來自東紫騮小兒鞍馬工場花撲面氣如  
 醉桑葉抽心春已空山川近接秦圖裏雲雨依稀楚  
 賦中却憶邯鄲南陌上羅敷彈瑟爭春風

九

道里三千慎卜居艱難百一在防初病身虛念盧敖  
 術旱歲兼思鄭國渠解慍細披風拂戶忘憂空對草  
 依除同時年少矜榮利辛苦虞卿獨著書

初夏過龍巖寺

喧途逃暑空門寂雲覆流泉靜遶堦灌木楊花俱漠  
 漠白鳩黃鳥各啾啾隋唐半闕豐碑勅秦楚平分洛  
 水涯聞道淵明新止酒擬將身會八關齋

後喜雨篇

家食頻憂歲所營僅八口及乎再出宰望年如思婦  
 不敢究其始農夫屢陽九四月而不雨稼穡亦何有  
 內熱竭精禱喘汗非趨走剪爪復披髮此身等敝帚  
 赫赫雷霆威昭鑒良已久三雨不越境吁駭造物厚  
 頗聞河南北疫癘到猪狗雖未食易子遂少完榆柳



區區黑子邑豐碩幾升斗來牟幸我私天意竟焉剖  
簪亂寸心破祥瑞見樽酒 聖人邁成湯得無氣數  
偶何況財用詘司農空疾首小臣忝肉食鹿鹿真可  
醜安得霈清霖乾坤滌以手虹蜺莫浪出蛟龍時鳴  
吼鼎鼐慎毋踈題詩布賓友

夏日宦情六首

請謁傷孤性周旋愧直躬微官多口裏時事腐心中  
河圻通秦晉天廻抱洛嵩朝廷虛鼎鼎日月尚隆隆  
仁愛尋常見憂危百一同拂衣粗自解好在仗羣公

二

山城一事無閉閣滿青蕪辟地花深隱無名鳥怪呼  
小臣時慟哭薄宦日艱虞落落憐知己區區憶友于  
他鄉偏病暍故態愧如愚苦思東山卧松陰浸玉壺

三

國步新多難 天威屢遠揚粵東氛警急滇徼血玄  
黃節制諸臣失寬容大體當桑榆應未晚蜂蠆必無  
傷勿狃權宜幸還期賞罰彰 至尊眷東顧將帥問  
遼陽

四

敢論 朝廷體虛防禍福幾庶人紛有議大老盡求  
歸百疏司農急諸邊戍卒稀十年難宿飽中夜哭無  
衣使者徵求峻山東水旱饑杞憂寧勿驗凡百仗  
天威

五

天王自明聖朝野更無人喉舌多虛席江湖滿逐臣  
掖垣空燕語臺栢坐烏馴責備三公數嫌疑八俊頻  
溫留骸骨請畧答股肱親小吏堪棲隱何勞嘆積薪

六

養拙風塵遠全生滑稽看銜杯憶河朔乞米滿長安  
進退時無據身名道未完林宗識更大孟博志應難  
山縣雲霞集炎天薜荔寒敢論時忌諱吏隱合微官  
贈傅元鼎明府

二

河朔佳公子千秋遂盍簪相逢一開口未見夙知心  
令尹差陵競文章豈陸沉從君問縣譜不讓傅山陰

河北疑無客周南幸有隣把詩過昔見對酒道予真

病獨憐同調狂知畏衆人風塵天地滿慷慨一沾巾  
游少林寺

名區開中天大千茲一闡鴻濛割其尻須彌類大衍  
道緣勝賞契事以傳燈顯布金三百頃遂覺祇園褊  
日月揚光華地與星辰轉少室亘天途青雲自舒卷  
崖崩太古雪三花淨如洗亭午鐘磬幽杳不聞雞犬  
牽羅結我帶薰風時微展累陟仰愈高方知所歷淺  
峯巒互賓主縹緲孰可選秦槐十畝陰鬱鬱虬龍緬  
西有嘉樹臺如看甘露泫灑然灌頂門暍病從此遣

我生嬰世塵出處何其舛咫尺津航間得無面目覩  
饒舌亦已非拂衣庶或勉

初祖菴

震旦來一葦江有東流波少室開闢前欽崆日月過  
廓然自不識壁景亦已多彷彿滅沒內石乎如我何  
墓履復言歸歸者又誰那浮生迷津梁願歸屢蹉跎  
中庭千歲栢上有百尺蘿挽蘿欲鏟盡其奈無斧柯

嵩陽宮歌

乾河礪礪山龍從四月天黃赤日風麥隴半枯蜻蜒

舞逢人復問嵩陽宮故基遺構不可睹惟有三栢鼎  
樹摩蒼穹曲凹十圍深隱馬幹秃皮皴如僵虹半死  
半生鬼神護倏東倏西日月通傳言漢封頗未辨唐  
人之碑亦豐崇牧牛磨角龍篆沒蒼苔濯雨蟲書同  
憶昔武帝巡幸日千乘萬騎鬱青蔥誰其聞者呼萬  
歲荒唐信之終愚蒙卽論此宮金銀闕鸞鶴歲蕤三  
花紅瑤殿翠華安在哉豈意於今蒿草叢三栢閱世  
幾千載風霜屢入感慨中古今鐫題詩有篇其人往  
往逐飛蓬嗚呼使我不悲嵩陽宮

同傅元鼎遊中嶽

高高自上古峻極造太清嶸嶸表天柱歛吸絕生成  
三花發瑤檢露葉夾雲莖二室相橫亘揖讓若弟兄  
決眼入三河他山徒硜硜登陟愜心期招攜兼友生  
平生五嶽願茲也結初盟主賓各不負俱留千載名  
悠悠一世入歷覽皆含情相對盡爲客偶爾感合并  
飽聞前朝事萬乘擁霓旌秩祀隆百代壯哉帝王程  
山川紀功德星辰揚光精牲璧久滅沒探策竟誰明  
後世絕省方黎庶適無驚禮樂貴通變馨香惟利貞

四月旱頗甚茂宰憂如醒爲君鼓薰風一爲解愠鳴  
神嶺白日蔽高閣丹霞平渺渺懷古僊登舉鴻毛輕  
願隨浮丘伯雲中學吹笙

同元鼎遊盧巖寺

盧浩然鴻  
一棲隱處

盧巖嵩之坳崖根豁一半前賢所隱居跡爲名勝冠  
絮雲冒重岫光華常似旦飛泉鬪流霞俯注谿衍散  
濤聲懸百尺碧與千頃亂琪花飄香雨紫蟹穴空岸  
石壁白口藏金沙明珠燦晤賞睠伊人道契同汗漫  
朗詠大人歌超哉凌風翰孰令意不甯臨觴喟三嘆

箕山

箕山於太室如岱有梁甫輔嶽金稱尊他山遑敢侮  
潁水源更清石流歷可數所以讓王人洗耳臨其澣  
一瓢棄陶唐飲牛愧巢父後代鮮若儔高風激千古  
緬懷睠有遇嗟哉不復睹惟見波湛湛雲氣朝如雨  
褰裳行欲涉身上慙珪組孰云能曠覽徒羨翩翩羽  
茲意諒自解來者將可補

朱僊鎮

朝日生更死風沙莽茫茫中原萬里血天地百年創

茲地之得名惟岳武穆王書生能料事父老淚萬行  
志灰北轅墮色沮南旆翔功業一旦棄慟哭愁雲揚  
萬姓淪腥腐日月無迴光禍逮六百載開闢待 高  
皇嗚呼皆天也撫徃徒悲傷至今祠屋崇伏臘勤蒸  
嘗義士頭觸柱行者爲斷腸古樹啼黃鳥道暘猶壺  
漿汴水泣晝夜新柳綠間黃詠言五內熱儻焉著斯  
章

朱僊鎮題壁二絕句

去歲湯陰祠今歲朱僊鎮瞻謁不能言令人氣俱盡

二

淚血何時竭征雲萬古飛不見金牌詔如聞鐵騎歸  
汴京懷古四首

兔園競豪奢平臺盛藻雅賓客美遨遊鄒枚與司馬  
詞賦留人間悠悠誰嗣者

後游作者誰杜甫與高李酒酣上吹臺歌嘯今已矣  
懷古向千載不盡東流水

吾代空同子更築翛然臺登臺望天地萬里黃河來  
補月徒虛願風流安在哉

我登夷門臺長嘯首獨搔古人俱不見汴水自滔滔  
傳語後世客復弔李與高

十絕句

滇南萬里血模糊城下圍開太守符十載撫臣勞貢  
獻可憐端委一愁無

二

紛紛奏捷已多時怪得春來羽檄遲慙聽官軍多殺  
賊傳聞道路莫相疑

三

將帥平時節制尊 朝廷聊假敝帷恩後來休合前  
車轍 聖斷如神自不言

四

釜魚游息欲何逃虜粉終憐萬姓勞數月更疑消息  
斷他時早許事功高

五

洶洶遼陽一十年滿朝肝膽誓回天偷生軍吏皆流  
涕得見溫綸倍可憐

六

狼狽中官先獨歸萬人遺痛淚橫揮始憐日月能迴  
照未必雷霆再襲威

七

金吾夜半尺書馳將吏倉皇赴闕期此地百身寧可  
贖小臣萬死亦何辭

八

纔聞天子寬仁語亦有諸公流涕書料得轉圜今  
日事 聖慈中外體如初

九

宰相調停事渺茫空煩口舌鬪劬任教臺省無封  
駁未改 朝廷有紀綱

十

牢落長安尚百官紛紛議論亦多端羣臣好慮 今  
王體國是都留後世看

飲張萼

逃名謝客已三春空谷何因更有人為問年來開酒  
日紫薇花下醉張萼

隱詩三首



東國有靈鳥所貴見者稀孰令不藏羽網羅竟欲施  
本圖儀聖人鳴臬翻見欺鍛翻棲荆棘稻梁終自悲  
哀音和經韶舉世誰聽之阿閣阻天衢丹穴好歸來  
惟念瑞帝符中道以徘徊在野遠腥腐寧甘渴與饑  
思漉心間血毋恤凡鳥嗤

二

鳳凰不世出周岐與重華一鳴五穀熟再鳴四時和  
德衰鳴不息鳳凰何其多

三

天門九重扃虎豹守其側帝居一何邃閭闔沉光黑  
雷霆時奮威白日久已匿皇皇彼下土排闥竟無力  
雖有心肝血欲薦帝不食蜚鴻翔四野鬼魅處有北  
安得驚人鳴一爲活邦國

江南吟

河南苦旱江南水四方屢歲勞天子羣臣多進修省  
詞 聖明輒降寬恤 旨司農會計况無儲散財發  
粟君有餘百姓但當忍死待只恐不待化爲魚

哀時物

驚風暗雲吹滿縣白日忽忽如流電七月不雨禾黍  
乾八月已空場圃晏秋深燕子無顏色燠久飛螢亦  
希見乾坤正當全盛時江北江南偶災變 天子垂  
拱四十年四夷受賞來近邊大內黃金高北斗萬國  
敢知徒相憐父老流涕私自語忍饑緩死恃皇天滇  
南罷戰遼東宴漢主寬責租庸錢陋邑荒涼緣山谷  
流冗紛紛就草木頗聞十家五家空相接東村西村  
哭慎莫出口長官嗔安得明目 朝廷燭小臣不知  
其所以仰視鴻蜚天地速

遣興三首

丈夫處末世特達秉清機古今閱聖賢軼軻同所歸  
皚皚霜露繁秋草不復肥愚智等礧斧玉石俱灰飛  
天地日鹵莽踈蕪生事微辛鉞曉權術伯夷則采薇  
結託將何適深衷在知幾

二

鞏洛天地中自古龍戰場至今風塵內雲氣或玄黃  
百年見全盛潼關表金湯金銀貢大內峭函日相望  
明王慎儉德寰區守紀綱我生亦已晚猶及見小康

蠢蠢黎氓動得無  
蟻孔防痛思萬曆  
初相業尚煌煌  
美哉山河固天險  
良未央

三

維夏膏時澤良苗  
芄芃好何意七八  
月亢陽殺百草  
歲事在有終春華  
安足道有類英俊  
士致身豈必早  
壯歲無成名坎壈  
傷懷抱賈生方吊  
屈蘇子誇妻嫂  
寵辱夫何云饑渴  
以終老宿昔忘怨  
尤憂來不可掃

輓韋孝廉八韻

秋風吹洛水落日  
黯嵩雲之子蘭先  
折高才燭自焚

孝廉曾金載賓客  
惜離羣聞道精靈  
假伊人夢覺分  
少年聊好內有兆  
替修文哀雁沾霜  
斷啼鴉墜血紛  
酒星天上益薤露  
世間聞不待山陽  
笛蕭蕭苦憶君  
寄題仇惟尚明志樓

舉世競衮衮富貴  
浮雲行伊人乃遂  
初澹泊無所營  
高樓偃仰問翛然  
素志明絳老記甲  
子承顏綵衣輕  
春酒堂燕賀冬雪  
饌魚蘋娛樂此未  
艾達者遺其情  
睡心菴

茅菴結雲根其大  
僅容膝神光漾姑  
射睡穩獨抱一

秋被照螢火夜床親蟋蟀澹然至人心虛白生幽室  
有時夢太古清魂隨六逸醒覺在一朝世事從此畢

致爽臺

高臺臨太行雲霞生其巔爽氣若冰雪飛來肌膚寒  
朝夕變歛吸日月分往還長嘯懷天際而疑非人間  
何似長安道黃塵蒙苦顏班班騎瘦馬手板柱西山

感懷二首

少小志虛曠青雲如相待形骸本支離迫此樊籠內  
才器富強資遭遇憂患大伉婞嬰世務局體成拘閔

皦皦尚平生悠悠閱朋輩頗諱痛哭書時發公正慨  
十年官不調煩促勤蹠拜甫壯筋骨酸撫昔齒髮快  
百姓類屬毛孫僑著古愛束縛就苛細擺落畧茫昧  
萬山拱熊耳中流一衣帶秋濤上風雲驚樹鳴竿籟  
卽妨水旱仍其若衣食奈外事督有司陰陽問鼎鼐  
天意不可訴身世終焉屈饑獸匪仰秣涸鱗思湍瀨  
已豁徃者非宦情計難再降辱等糞土雅志在蟬蛻  
陶潛饑乞食范公遠禍害汚隱有明規竊比庶夙蕪

秋氣山川悲凍雨萬井煙陰森雲覆屋擁塞知天寒  
邑里類空村朝春時應山飄零泣草木次萬皆如言  
堅哉松栢心霜雪保其顏鷹隼刷羽翮萬里擊秋天  
回思執熱時煩酷在一蠲賤子何足論愁慕期治安  
本朝所豎立恭惟 上意玄百僚如晨星中外固晏  
然未廢獻納體羣猜密勿權空虛雖古鑑法則視前  
賢子孫引勿替舊章庶罔愆海內想 孝皇聖化綿  
千年嗟余睹時物興激在心肝湏洞憂運數託風強  
詩篇

秋雨

雲雨亦何晚蕭蕭秋暮時山川忽參錯天地一迷離  
蝸跡依稀見蟬聲老大悲空村聞野哭萬里動哀思  
題畫六絕句

行人白雲中雲氣下無底徘徊上下天鷄鳴莽蒼裏  
二

朝烟多在樹夕烟多在浦一夕復一朝烟光變今古  
三

山寺接城闔鐘聲兩不聞盈盈對一水相隔幾重雲

四

孤舟橫晚溪日入丹霞飲釣竿倚長虹醉眼清流枕

五

熊耳六月雪月明常似日隱几時誤看峩嵒天一半

六

春水汎桃花深藏二女家外人何事入勾引飯胡麻

官署秋感廿韻

又是高秋節蕭蕭白雁來黃河下木葉凍雨衰莓苔  
野蔓寒俱斂飛蓬逝不回飄零行已矣濼沈一悲哉

俯仰人間世淒涼異代才山城容隱几齋閣間登臺  
十載慙郎宿中宵望斗魁江湖長寂寞時序遣徘徊  
月濯金莖冷風邀玉笛哀古牆虛翠薄斷岸晚烟開  
天白低看劍岩空應伐枚蛩聲如怨慕螢火若歛頽  
屢折臨川屐難呼庾亮杯前賢嘆骨朽往事久心灰  
獵獵森雲霧荒荒漫草萊豺狼狂顧侶鷹隼出羣材  
碧動霜濤減殷凝露柳摧熊兒爭窟穴僊子宅崔嵬  
數粒恒饑鳥西江有暴鯁宦情日搖蕩准擬衆人猜

禹廟

熊耳乘標積龍門砥柱功野祠連斷壁秋水 upper 卑宮  
風雨荆榛夕馨香伏臘通千秋見明德百折洛河東

秋霽朝望

秋雨驚時序初晴悅物華空青開遠嶂虛碧動寒沙  
燕舞清暉上鷗迴素影斜蕭疎帶歸興悵望渺蒹葭

復陰

易晴已陰伏忽雨又雲根閃閃朝霞影微微宿霤痕  
野虛侵樹靜溪滿帶槎喧吏隱空山裏蕭條似故園  
甚苦雨歎

七月嗟雲漢八月雨彌旬季秋行夏令百物鮮所臻  
陰陽鬱不解露雲被天垠天地合而閉愁霖草昧屯  
文石穿清霤懸榻上青蘋白日時間出濕光如浴新  
豈惟人事病荒塞廢化醇萇楚雖無知泫然一酸辛  
安得五色石補苴撐秋旻太陽照萬彙永貞造化仁  
恭聞一日間 朝廷滿羣臣四方無盜賊水旱相因  
循中原骨髓乾催租捉親隣此語勿輕聞災異達官  
嗔書題于篋笥哀怨難重陳

秋雨引

十日不見日天地如墨色突兀山川秋鳥鳴獸駭匿  
雨聲漏屋床屢移薪絕釜空朝不食妻妾玉顏暗如  
土嬌女癡婢早啾唧嗚呼誰者野哭聞呼號九重深  
深彼蒼高





